

每週經課朗誦經文(巴克禮台語漢字)2013/01/20

共同經課 - 1 以賽亞書六十二章一節~五節

1 我因為錫安的緣故的確無靜靜，因為耶路撒冷的緣故的確無歇暈，直到伊的公義親像光啲發出，伊的拯救親像燈啲toh。2 列國欲看你的公義；列王欲看你的榮光。你欲得著稱呼新的名，就是耶和華親嘴所稱呼者。3 你欲佇耶和華的手中做媿的王帽，佇你的上帝的手掌做冕旒。4 你無閣稱做「受棄揀者」；你的地也無閣稱做「拋荒者」。你欲稱做我「所歡喜者」；你的地也欲稱做「有丈夫者」。因為耶和華歡喜你，你的地也欲做有丈夫者。5 因為親像少年人娶在室女，你的百姓也欲按呢娶你；親像新子婿歡喜新娘，你的上帝也欲按呢歡喜你。

共同經課 - 2 詩篇三十六篇五節~十節

5 耶和華啊，你的慈愛是佇天裡；你的信實到佇穹蒼。6 你的義親像極高的山；你的判斷是親像深淵。耶和華啊，人及精牲，你攏保護in。7 上帝啊，你的慈愛怎樣許寶貝啊！世間人匿佇你翅股的致蔭下。8 in欲因為你的厝的好物得著飽足；你亦欲互in飲你快樂的河水。9 因為，活命的源頭在佇你遐；佇你的光，阮欲看見光。10 願你常常施慈愛互識你的人，常常用你的公義施互心內正直的人。

共同經課 - 3 哥林多前書十二章一節~十一節

1 兄弟啊，論到神的賞賜，我毋愛恁毋知。2 恁知恁做外邦人的時，受迷惑去就近袂講話的偶像，出在伊引誘。3 所以我互恁知，互上帝的神感動來講的，無人講「耶穌是通咒詛」；若毋是互聖神感動的，也無人會講「耶穌是主」。4 今恩賜有分別，若是神是像一個。5 職份有分別，若是主是像一個。6 功用有分別，若是上帝像一個，施行萬事佇眾人中的。7 若是聖神的顯明是賞賜逐人，欲利益眾人。8 因為有的對神用智慧的話互伊，有的照此個神用知識的話互伊，9 閣有人佇此個神用信互伊，有的佇此個神用醫病的恩賜互伊，10 有的互伊會行各樣的權能，有的互伊做先知，有的互伊會分別諸個神，閣有的互伊會講逐樣的音語，有的互伊會翻譯逐樣的音語。11 諸個攏是像一個神所施行的、照伊所愛的隨樣分互逐人。

共同經課 - 4 約翰福音二章一節~十一節

1 第三日，佇加利利的迦拿有婚姻的筵席，耶穌的老母佇遐。2 耶穌及伊的學生也互in請去赴筵席。3 酒用了，耶穌的老母就對伊講：「in無酒啦。」4 耶穌給伊講：「老母啊，我及你甚麼干涉？我的時猶未到。」5 伊的老母給諸個差用的人講：「凡若伊給恁講的，恁著行伊。」6 照猶太人洗清氣的例，佇遐有排六個石甕，逐個會貯得二三桶水。7 耶穌給差用的人講：「用水互伊滿甕。」就互伊滿到甕口。8 閣給in講：「今著舀伊，捧互掌理筵桌的人。」就捧互伊。9 水變做酒，掌理筵桌的試飲伊，毋知對叨落來，獨獨舀水的差用知。掌理筵桌的就叫新子婿來，10 給伊講：「人攏是代先排好酒，到人飲多多，才用卡次的，獨獨你留好酒到此霎！」11 此個頭一擺的神蹟，耶穌行佇加利利的迦拿，來顯出伊的榮光；伊的學生就信伊。